

宋史新編

宋史新編卷十一

本紀十一

明南京戶部主事莆田柯維騏著

孝宗

孝宗紹統同道冠德昭功哲文神武明聖成孝皇帝諱  
昀字元永太祖七世孫也初太祖少子秦王德芳生次  
子英國公惟憲惟憲生新興侯從郁從郁生華陰侯世  
將世將生慶國公令諡令諡生子侁是爲秀王王夫人  
張氏夢人擁一羊遺之已而有娠以建炎元年十月二  
十二日生帝于秀州紅光滿室名伯琮及元懿太子薨  
高宗未有後昭慈聖獻皇后語以異夢高宗大寤會右

僕射范宗尹亦造膝以請高宗曰太祖以神武定天下子孫不得享之遭時多艱零落可憫朕若不法仁宗爲天下計何以慰在天之靈於是詔選太祖後已而同知樞密院事李回參知政事張守咸贊決而上虞丞婁寅亮亦上書言之乃紹興二年五月選帝育禁中三年賜名瑗授和州防禦使改貴州五年進保慶軍節度使封建國公十二年二月加檢校少保進封普安郡王逾月出閣就外第十四年正月以秀王喪解官十六年四月免喪還舊官十七年改鎮常德軍二十四年衢州盜起秦檜遣捕不以聞帝入侍言之高宗太驚及檜疾篤其

家祕不以聞謀以子熈代相帝又密啓高宗破其奸三  
十年二月立爲皇子更名瑋進封建王四月賜字元瓌  
三十一年十月改鎮鎮南軍先是金人犯邊高宗下詔  
親征而兩淮失守朝臣多陳退避計帝不勝其憤請率  
師爲前驅翰林學士史浩言太子不宜將兵高宗欲帝  
遍識諸將遂扈蹕如金陵二十二年五月甲子立爲皇  
太子改今名并賜字乙亥內降御札皇太子可卽皇帝  
位丙子百官拜詔畢入班殿庭內侍掖帝至御榻側立  
下坐扶掖至七八乃略就坐宰相率百僚稱賀帝遽興  
輔臣升殿固請帝愀然曰君父之命出於獨斷然此大

位懼不克當班退太上皇帝卽駕之德壽宮帝步出殿  
門且雨掖輦及宮門弗止上皇麾謝再三顧曰吾付託  
得人吾無憾矣丁丑朝德壽宮戊寅大赦甲申詔中外  
士庶陳時政闕失丙戌宰執陳康伯以下各進秩丁亥  
詔以太上皇不許五日一朝自今月四朝復胡銓官  
饒州甲午上太上皇帝尊號曰光堯壽聖太上皇帝后  
曰壽聖太上皇后乙未晦金人屠原州秋七月癸卯以  
張浚爲江淮宣撫使封魏國公戊申追復岳飛官以禮  
改葬八月乙丑朔四川馬軍統制高師中與金人戰于  
摧沙死之己巳以史浩參知政事丁亥班寬恤事十八

條戊子追復李光官趙鼎范冲竝還恩數庚寅以主日  
爲會慶節九月甲午進封子愔鄧王愷慶王惇恭王金  
人攻德順軍東山堡中軍將李庠戰死丁酉詔開講日  
召輔臣觀講川陝宣諭使虞允文以論邊事不合罷庚  
子詔金人來索舊禮羣臣各陳應敵定論以聞冬十月  
丙寅詔朝臣舉堪監司郡守者已巳葉義問罷提舉太  
平興國宮戊子以張壽岡知樞密院事十二月乙丑詔  
宰臣復兼樞密使丙寅詔棄德順城徙兵民于秦州以  
裏屯住宣撫使吳璘遂班師丙戌詔觀察使以上各舉  
所知二人三省樞密院詳議立格以聞是冬交趾闍婆

占城國王竝加食邑實封

隆興元年春正月壬辰朔帝朝德壽宮自是歲如之立  
武臣薦舉格庚子以史浩爲尚書右僕射同中書門下  
平章事兼樞密使張浚進樞密使都督江淮東西路軍  
馬丁巳詔吳璘軍進退可從便宜璘已棄德順道爲金  
人所邀將士死者數萬人新復十六州軍俱陷二月癸  
未黃祖舜罷知潭州庚寅逐秦檜黨人仍禁輒至行在  
三月壬辰朔金帥紇石烈志寧以書來求海泗唐鄧四  
州地及歲幣癸巳以張燾參知政事辛次膺同知樞密  
院事燾未幾罷庚子以龍大淵知閣門事曾覲同知閣

門事未幾竝罷甲寅復以龍大淵曾覲知閣門事給事中中書舍人留黃不行是月詔求遺逸夏四月戊辰張浚被命入見議出師渡淮三省樞密院不預聞壬午詔戶部臺諫議節浮費戊子張浚命邵宏淵帥師次盱眙己丑又命李顯忠帥師次定遠是月金人拔環州守臣強寬及弟震死之五月甲辰李顯忠及邵宏淵敗金人于宿州乙巳史浩罷知紹興府丙午復宿州戮金兵數千人建康前軍統領王琪巷戰死之丁未以辛次膺參知政事洪遵同知樞密院事督諸路開營田辛亥詣德壽宮賀天申節自是歲如之癸丑金人攻宿州城李顯



忠大敗之殿前司統制官張訓通等七人統領官十二人以二將不協而遁甲寅李顯忠邵宏淵軍大潰于符離乙卯下詔親征六月庚申朔日有食之癸亥汪澈罷提舉洞霄宮張浚乞致仕且請通好于金皆不許戊辰召虞允文以周葵參知政事癸酉下詔罪已張浚降授江淮東西路宣撫使邵宏淵降官階職仍舊戊寅辛次膺罷提舉洞霄宮己卯貶李顯忠筠州安置秋七月庚寅朔以虞允文爲湖北京西制置使以癸巳以湯思退爲尚書右僕射同中書門下平章事兼樞密使再貶李顯忠潭州安置乙巳以旱蝗星變詔行從臺諫兩省官條

上謂政闕失丁未詔徵李顯忠侵欺官錢金銀免籍其  
家八月丙寅張浚復都督江淮軍馬戊寅金帥又以書  
求海泗唐鄧四州地及歲幣癸未復以龍大淵會覲知  
閣門事丙戌遣盧仲賢等齎書如金軍戒勿許四州差  
減歲幣冬十月戊午朔大臣奏金帥書言四事帝曰四  
州地歲幣可與名分歸正人不可從丙子立夏氏爲皇  
后十一月己丑盧仲賢自宿州得金帥僕散忠義遺三  
省樞密院書以歸庚子遣王之望等爲金國通問使辛  
丑詔集議講和遣使禮數土貢四事丙午盧仲賢以擅  
許四州下大理寺奪二官癸丑以胡昉楊由義爲使金

通問國信所審議官十二月己未陳康伯罷判信州丁丑以湯思退爲尚書左僕射張浚爲尚書右僕射並同中書門下平章事兼樞密使浚仍都督江淮東西路軍馬是歲蠲兩浙江東水旱租

二年春正月丙午金帥僕散忠義復以書來二月乙酉胡昉自宿州還初金帥以昉等不許四州械繫之昉等不屈金主遣之歸三月丙戌朔詔張浚視師于淮金兵退丁亥貶盧仲賢械送郴州編管夏四月丁丑張浚罷判福州未幾卒五月壬辰詔曰朕惟祖宗選用將帥以禦武節外建方鎮內列環尹品式備具近來環衛久不

除授非所以儲材而均任也可依舊制應以才略聞堪  
任將帥及久勤軍事暫歸休佚之人竝爲環衛官更不  
換授竝令兼領六月甲寅朔日有食之王申命虞允文  
棄唐鄧允文不奉詔秋七月乙酉召虞允文還以韓仲  
通爲湖北京西制置使丁亥洪遵罷提舉太平興國宮  
已巳命海泗州徹戍八月庚辰以賀允中知樞密院事  
壬午遣魏杞等爲金國通問使九月丁酉嚴賊吏法辛  
丑以王之望參知政事時久雨出內庫白金四十萬賑  
貧民癸卯命湯思退都督江淮東西路軍馬辭不行乙  
巳復命楊存中爲同都督錢端禮吳芾竝爲都督府參

贊軍事冬十月甲寅魏祀至盱眙金帥以國書未如式弗受欲得商秦地及俘獲人且邀歲幣二十萬祀未得進丁卯賀允中罷爲資政殿大學士致仕庚午詔曰朕每聽朝議政頃刻之際意有未盡自今執政大臣或有奏陳宜於申未間入對便殿庶可坐論得盡所聞期躋於治辛巳金人分道渡淮劉寶棄楚州遁十一月乙酉知楚州魏勝與金人戰死之州遂陷濠州亦陷王彥棄昭關遁滁州又陷庚寅命楊存中都督江淮軍馬辛卯湯思退罷提舉太平興國宮尋貶永州居住未至卒甲午太學生張觀等七十二人上書請斬湯思退王之望

尹穡竄其黨洪适晁公武而用陳康伯胡銓等以濟大計丁酉以金人犯淮南詔擇日視師戊戌以陳康伯爲尚書左僕射同中書門下平章事兼樞密使辛丑以錢端禮簽書樞密院事壬寅以虞允文同簽書樞密院事癸卯遣王之望勞師江上巳酉劉寶王彥有罪並貶秩閏月丙辰周葵罷提舉洞霄宮王抃見金二帥得其報書以歸戊辰以金兵且退詔督府擇利擊之王之望執不可乙亥王之望罷提舉太平興國宮丙子以王抃爲使金通問國信所參議官持陳康伯報書以行十二月辛卯以錢端禮參知政事虞允文同知樞密院事王剛

中簽書樞密院事丙申詔曰比遣王朴遠抵穎濱得其  
要約尋澶淵盟誓之信放大遼書題之儀正皇帝之稱  
爲叔姪之國歲幣減十萬之數地界如紹興之時憐彼  
此之無辜約叛亡之不遣可使歸正之士咸起寧居之  
心重念數州之民罹此一時之難老稚有蕩析之哉丁  
壯有條纍之苦宜推蕩滌之宥少慰彫殘之情應沿邊  
被兵州軍除逃遁官吏不赦外餘竝放遣是歲交趾來  
貢

乾道元年春正月辛亥朔合祀天地于園丘大赦改元  
辛酉召楊存中通問使魏杞至燕山金主命帥府罷兵

歸國祀卒正敵國禮而還二月庚辰從太上皇太上皇  
后幸四聖觀丁未陳康伯罷爲觀文殿大學士致仕尋  
卒三月庚申以虞允文參知政事王剛中同知樞密院  
事未幾剛中卒夏四月庚子金報問使完顏仲等入見  
六月丙戌以洪适簽書樞密院事壬辰淮南轉運判官  
姚岳言境內飛蝗自死奪一官罷之秋七月癸丑輔臣  
晚對選德殿御坐後大屏記注諸道監司郡守姓名因  
命都堂視此書之八月乙酉詔立鄧王惲爲皇太子丁  
亥虞允文罷提舉江州太平興國宮戊子大赦己丑以  
洪适參知政事葉顥簽書樞密院事癸巳錢端禮避東



宮親嫌罷提舉萬壽觀九月乙卯立錢氏爲皇太子妃  
甲戌以汪澈知樞密院事冬十二月戊寅以洪适爲尚  
書右僕射同中書門下平章事兼樞密使汪澈爲樞密  
使庚寅以葉顥參知政事辛卯詔侍從臺諫兩省舉堪  
監司郡守者各一人三衙知閣舉材武可守邊者一人  
是歲金人先後遣使來賀會慶節及正旦自是歲交遣  
使如故事

二年春二月丁丑振兩浙江東饑三月辛未洪适罷提  
舉江州太平興國宮癸酉以魏杞同知樞密院事丁丑  
罷和籩夏四月戊寅以久雨命侍從臺諫議刑政所宜

以丙乙未汪澈罷提舉洞霄宮五月庚戌葉顥罷提舉  
洞霄宮以魏杞參知政事林安宅同知樞密院事蔣芾  
簽書樞密院事秋八月丙戌林安宅罷尋貶筠州居住  
九月知上元縣李允升以贓杖脊刺面配惠州籍其貲  
建康守臣王佐坐縱允升貶建昌軍居住其薦舉及失  
按者竝奪官冬十一月甲子大閱是月詔汰冗兵十二  
月甲申以葉顥爲尚書左僕射魏杞爲尚書右僕射竝  
司中書門下平章事兼樞密使蔣芾參知政事陳俊卿  
同知樞密院事庚寅置制國用司以宰相兼領之癸巳  
詔監司守臣舉廉吏

三年春正月甲辰詔戒大理寺曰獄重事也稽者有律  
當者有比疑者有讞比年顧以微情白於宰執採取旨  
意以爲輕重甚無謂也自今其祇乃心敬於刑惟當爲  
貴母習前非不如吾詔吾將大寘於罰罔攸赦二月癸  
酉出龍大淵爲江東總管會觀爲淮西總管辛巳以虞  
允文知樞密院事戊戌直祕閣石敦義以賊刺面配柳  
州籍其家是月從不上皇太上皇后幸玉津園二月復  
從幸聚景園歲以爲常壬戌伯母秀王夫人張氏薨夏  
四月癸酉爲王夫人成服于後苑六月己巳以虞允文  
爲四川宣撫使帝親書九事戒之辛卯皇后夏氏崩秋

七月己亥皇太子愔薨癸酉攢安恭夏皇后于臨安修  
吉寺八月丁酉內侍陳瑜李宗回坐交結成方受賂瑜  
決杖黥面配循州宗回除名筠州編管方責授果州團  
練副使潭州安置籍所盜庫金縞軍冬十一月丙寅合  
祀天地于圜丘大赦癸酉以郊祀雷葉顥魏杞竝罷提  
舉太平興國宮以陳俊卿參知政事劉珙同知樞密院  
事丁丑以雷發非時求直言是歲兩浙水四川旱江東  
西湖南北蝗振之占城來貢

四年春正月壬午奪秦塤秦堪郊恩蔭補二月己亥以  
蔣芾爲尚書右僕射同中書門下平章事兼樞密使兼

制國用使乙巳以王炎簽書樞密院事癸丑五星皆見  
夏四月丙辰禮部員外郎李燾上五朝續通鑑長編五  
月丙戌班乾道曆六月辛丑五星皆見丁巳召興化軍  
布衣林象赴行在戊午右僕射蔣芾母喪去位秋七月  
壬戌召建寧布衣魏揆之赴行在戊寅知衢州王悅以  
盛暑禱雨蔬食減膳憂勤致疾而死贈直龍圖閣八月  
乙未班祈雨雪之法於諸路己亥五星皆見庚戌劉珙  
罷知隆興府冬十月庚子蔣芾起復尚書左僕射陳俊  
卿尚書右僕射竝同中書門下平章事兼樞密使兼制  
國用使蔣芾辭起復許之甲辰大閱十一月己亥詔改

州布衣郭雍赴行在是歲振綿漢邛蜀等州饑減兩浙江東西路明年夏稅和市之半

五年春正月甲戌措置兩淮屯田二月壬寅以梁克家簽書樞密院事甲辰以王炎參知政事夏六月己酉以虞允文爲樞密使秋七月出會覲爲浙東總管八月甲申朔日有食之己丑以陳俊卿爲尚書左僕射虞允文爲尚書右僕射竝同中書門下平章事兼樞密使兼制國用使冬十一月癸丑朔復置淮東萬弩手名神勁軍庚申增置廣東水軍辛未詔侍從臺諫兩省官各歲舉朝官以上才堪監司郡守者二人是歲振恤饒信衢婺

五季系卷之二  
四州流民及溫台二州被水貧民

六年春二月壬寅詔曰朕深惟治不加進思有以正其  
本者今欲均役法嚴限田抑游手務農桑凡是數者卿  
等二三大臣爲朕任之夏四月戊戌吏部尚書汪應辰  
三疏論發運司罷知平江府五月己巳陳俊卿以議遣  
使不合罷知福州丁丑知潮州曾造贓罪貸命南雄州  
編管籍其家閏月癸巳以梁克家參知政事秋九月范  
成大使金還所請陵寢及更受書禮俱不從語在金國  
傳冬十月甲戌起居舍人趙雄請置局議恢復詔以雄  
爲中書舍人十一月壬午合祀天地于圜丘大赦丁酉

加上太上皇帝及太上皇后尊號十二月戊申大閱癸酉罷發運司以史正志奏課不實貶永州安置是歲兩浙江東西福建水旱

七年春正月作敬天圖帝謂輔臣曰無逸一篇享國長久皆本於寅畏朕近日取尚書所載敬天事編爲兩圖朝夕觀覽以自警省二月癸丑詔立子惇爲皇太子大赦進封愷魏王三月乙亥朔趙雄等使金復請更受書禮金主不從詔訓習水軍丙子立李氏爲皇太子妃己卯起復劉琪同知樞密院事以張說簽書樞密院事言者相繼論說不宜執政未拜而罷夏四月己巳詔侍從



臺諫兩省舉任刑獄錢穀及有知略吏能者各二人辛未命皇太子領臨安尹五月丁亥劉珙辭起復以爲荆襄宣撫使固辭不拜庚寅金人葬欽宗于鞏原秋七月庚子以王炎爲樞密使四川宣撫使冬十二月壬申臨安府尹周淙以獄空聞詔曰畿方千里俗具五民趨利者率多巧僞亡身者公肆奪攘非聞之以義守之以信求囹圄之空未易得也卿以吾上嗣尹正是司布政以來風流篤厚禁網疏闊刑罰用稀今焉俾無一人之獄足以副吾欽恤之意矣賀章來上嘉歎不忘自是屢奏屢獎語在刑法志是歲湖南江東西路旱振之

八年春二月乙巳詔改尚書左右僕射同平章事爲左  
右丞相辛亥以虞允文爲左丞相梁克家爲右丞相竝  
兼樞密使癸丑以張說王之奇竝簽書樞密院事侍御  
史李衡右正言王希呂交章論張說不報直學士院周  
必大不草答詔權給事中莫濟封還錄黃竝與外祠希  
呂衡尋亦罷丙寅以曾懷參知政事秋七月辛巳姚憲  
曾覲使金還所請受書事復不從九月戊寅虞允文罷  
爲四川宣撫使壬辰允文入辭帝諭以決策親征令治  
兵候報是歲江東西大旱四川水

九年春正月辛未王之奇罷知揚州王炎罷提舉洞霄

宮乙亥以張說同知樞密院事沈復簽書樞密院事戊寅以鄭聞簽書樞密院事二月壬申蠲江西旱傷五州逋負夏四月丁丑皇太子解臨安尹事五月壬辰朔日有食之己未迪功郎朱熹屢詔不起特改宣教郎主管台州崇道觀秋八月丙子詔曰朕惟旱乾水溢之災堯湯盛時有不能免民不告病者備先具也豫章諸郡縣但阡陌近水者苗秀而實高仰之地雨不時至苗輒就稿意水利不修失所以爲旱備乎唐韋丹爲江西觀察使治陂塘五百九十八所灌田萬二千頃此特施之一道其利如此矧天下至廣也農爲生之本也泉流灌漑

所以毓五穀也今諸道名山川原甚衆民未知其利然則通溝瀆陂澤監司守令顧非其職歟其爲朕相丘陵原隰之宜勉農桑盡地利平絲行水勿使失時雖有荒凶而力田者不至拱手受弊亦天人相因之理也朕將卽勤惰而寓賞罰焉冬十月辛未梁克家罷知建寧府甲戌以曾懷爲右丞相張說知樞密院事鄭聞參知政事沈復同知樞密院事十一月戊戌合祀天地于圜丘大赦改明年元十二月甲子沈復罷知荆南府乙丑以姚憲簽書樞密院事是歲函書附金使申議受書禮復不從浙東江東西湖北旱交阨來貢

淳熙元年春正月丙午詔賜交趾國名安南進封李夫  
祚爲安南國王三月丙申鄭聞罷爲四川宣撫使夏四  
月己卯以姚憲參知政事葉衡簽書樞密院事六月丙  
辰朔詔禮官討論別建四祖廟正太祖東嚮位戊寅曾  
懷罷提舉太平興國宮癸未姚憲罷尋貶之甲申以葉  
衡參知政事秋七月丁亥以鄭聞參知政事戊子詔舉  
廉吏壬辰復以曾懷爲右丞相八月己未張說罷提舉  
玉隆觀以楊俊簽書樞密院事冬十月丙寅參知政事  
鄭聞卒十一月甲申朔日有食之戊戌以龔夬良參知  
政事楊俊罷知荆南府丙午曾懷罷提舉洞霄宮戊申

以葉衡爲右丞相兼樞密使十二月丁巳以李彥穎簽書樞密院事是歲占城來貢

二年春正月庚戌詔籍諸軍子弟爲背嵬軍夏四月己巳幸玉津園帝謂輔臣曰朝廷用人只論其賢否何如不可有黨如唐牛李之黨稍攻四十年不解皆緣主聽不明又曰近來士大夫好倡爲清議恐相師成風如東漢激成黨錮之禍卿等宜書諸紳六月庚戌朔以沈復同知樞密院事丁卯用左司諫湯邦彥言貶蔣芾王炎張說各遠州居住秋七月辛丑有星孛于西方八月丁卯蠲湖南江西被寇州縣租稅九月乙酉振淮南水旱

州縣乙未葉衡罷知建寧府丁未沈復罷知鎮江府追復趙鼎爵邑封豐國公閏月丁巳以李彥穎參知政事王淮簽書樞密院事冬十月壬午加上太上皇帝及太上皇后尊號十一月戊午提點坑冶王揖進羨餘十萬緡詔却之十二月甲午太上皇壽七十詣宮行慶禮大赦百官加恩語在禮志

三年春三月丙午朔日有食之雲陰不見壬申立任子參選覆試法夏四月戊寅詔侍從臺諫兩省歲舉監司郡守各五人巳丑葉衡貢授安德軍節度副使郴州安置丁酉湯邦彥陳雷奉使無狀貶新州永州編管六月

甲午以朱熹累詔不起特命爲祕書郎辭不就秋八月  
乙亥以王淮同知樞密院事趙雄簽書樞密院事庚辰  
太上皇詔立貴妃謝氏爲皇后冬十月庚辰詔曰鬻爵  
非古也理財有道均節出入足矣妄輕官爵以益貨財  
朕甚不取自今除歲歉民願入粟賑饑有裕於衆聽取  
旨補官其餘一切住罷十一月癸丑合祀天地于園丘  
大赦是歲京西諸路旱浙東水竝振之黎州蠻寇邊  
四年春正月丁卯頒淳熙曆二月乙亥幸太學命祭酒  
林光朝講中庸遂幸武學學官諸生進秩賜賚有差三  
月壬子封李天祚子龍翰爲安南國王夏六月丁丑龔



茂良罷知鎮江府巳卯以王淮參知政事秋七月乙酉罷王粲從祀孔廟癸丑龔茂良責授寧遠軍節度副使英州安置竟卒貶所九月丁酉朔日有食之戊午閱蹴踘于選德殿冬十一月庚子以趙雄同知樞密院事十二月乙亥大閱是歲襄陽隨郢饑福建諸州水振之

五年春正月敕有司毋以程頤王安石之說取士三月丁未李彥穎罷知紹興府壬子以史浩爲右丞相巳未以王淮知樞密院事趙雄參知政事夏四月丙寅以范成大參知政事六月庚午飭百官毋得請託乙亥范成大罷知婺州甲申以錢良臣簽書樞密院事秋八月甲

午復制科舊法詔諸路守令曰比年以來五穀屢登蠶絲盈箱嘉與海內共享阜康之樂尚念耕夫蠶婦終歲勤動價賤不足以償其勞郡邑兩稅除折帛折變自有常制當輸正色者毋以重價強之折錢若有故違重置于法冬十月戊午孫擴進明州觀察使封英國公十一月甲戌史浩罷爲醴泉觀使乙亥以錢良臣參知政事丁丑以趙雄爲右丞相王淮爲樞密使是歲福建州興化軍水通秦楚州高郵軍田鼠傷禾三佛齊來貢

六年春二月壬辰參知政事錢良臣以失舉賊吏奪三官三月丙寅錄趙鼎岳飛子孫賜京秩夏六月甲午建

豐儲倉秋九月辛未大饗明堂復合祭天地大赦冬十一月乙卯朔帝著論數百言深原用人之弊因及誅賞之法命宰執示從臣于都堂十二月己亥詔自今鞠贓吏後雖原貸者毋以失入坐獄官是歲溫台州水和州旱廣西妖賊李接作亂討平之

七年春二月癸未朔初置廣南煙瘴諸州醫官辛卯魏王愷卒夏五月戊辰以周必大參知政事謝廓然簽書樞密院事秋八月丁酉置湖南飛虎軍九月癸亥詔常朝毋稱丞相名明日命樞密使亦如之是歲江浙西湖北旱黎州五部落進馬詔却之許其互市

八年春二月庚寅詔三省樞密六部置籍稽考興利除  
害等事夏五月戊寅詔監司守令勸課農桑秋八月庚  
戌趙雄罷知成都府癸丑以王淮爲右丞相兼樞密使  
甲寅以謝廓然同知樞密院事九月辛巳錢良臣罷奉  
外祠冬十一月甲戌以旱傷罷喜雪宴十二月癸卯朔  
以饒徽二州民流者衆罷守臣官出南庫錢三十萬緡  
付提舉常平朱熹振糶甲子下朱熹社倉法於諸路是  
歲江浙兩淮京西湖北潼川夔州等路水旱竝振之

九年春正月癸未罷樞密都承旨王抃予外祠夏四月  
癸亥帝覽陸贄奏議諭講讀官曰今日之政恐有如德

宗之弊者卿等條陳勿隱六月壬寅詔侍從臺諫各舉  
操修端亮風力彊明可充監司者二人戊午同知樞密  
院事謝廓然卒秋七月辛巳復出南庫錢三十萬緡付  
朱熹備振糶壬辰以李彥穎參知政事九月以王淮爲  
左丞相梁克家爲右丞相辛巳大饗明堂大赦冬十一  
月戊辰朔禁臣庶之家婦節僭擬是歲淮東浙西蝗

十年春正月丁丑以施師點簽書樞密院事甲午李彥  
穎罷二月癸卯提舉德壽宮陳源有罪連竄郴州籍其  
家三月戊辰敷文閣待制知遂寧府李燾上續資治通  
鑑長編全書夏六月戊戌監察御史陳賈請禁僞學秋

七月甲戌以夏秋旱暵求直言八月戊申以施師點黃洽並參知政事冬十一月壬戌朔日有食之甲戌大閱十二月丙子朝德壽宮行太上皇后慶壽禮是歲福漳言信吉州水京西金澧州南平荆門興國廣德軍江陵建康鎮江紹興寧國府旱安南貢馴象詔却之

十一年春正月辛卯朔雨土辛丑安化蠻蒙光漸等犯宜州思立砦廣西兵馬鈐轄沙世堅出兵討之獲光漸丙午詔江東西路諸監司義役差役從民便三月辛丑罷秀州御馬院莊歸其侵地于民夏六月庚申以周必大爲樞密使是歲江東浙西諸州水福建廣東吉贛州

建昌軍興元府金洋西和州旱

十二年春正月壬辰四川制置使留正誘青羌奴兒結殺之三月乙酉孫擴進封平陽郡王辛卯禁習渤海樂辛亥命侍從臺諫兩省總領管軍官各舉堪都副統制者一二人夏四月丙子謀言故遼太后林牙假道夏人以伐金密詔吳挺與留正議之六月戊寅太白晝見秋七月丁酉太白晝見經天甲辰以淮西屯田鹵莽總領軍帥漕臣守臣奪官有差冬十月辛亥加上太上皇及太上皇后尊號十一月辛丑合祀天地于園丘大赦

十三年春正月庚辰朔以太上皇壽八十率羣臣頌德

壽宮行慶禮大赦百官加恩夏四月辛亥詔吳挺結約  
夏人五月癸未日中有黑子自淳熙至此凡四見丙申  
賜冲晦處士郭雍號曰頤正先生仍遣官就問雍所欲  
言備錄來上秋閏七月戊申以留正簽書樞密院事已  
未五星皆伏八月乙亥朔日月五星聚于軫冬十一月  
丙寅梁克家罷爲醴泉觀使辛未裁定百司吏額十二  
丁戌戊大理寺獄空是歲利州路饑江西諸州旱

十四年春二月丁亥以周必大爲右丞相戊子以施師  
點知樞密院事夏六月戊寅以久旱班書龍祈雨法秋  
七月丁未以旱罷汀州經界八月癸未以留正參知政



事冬十月乙亥太上皇崩遺詔太上皇后改稱皇太后  
辛巳詔曰大行太上皇帝奄棄至養朕當衰服三年羣  
臣自遵易月之令可令有司討論儀制以聞詳見禮志  
十一月己亥詔皇太子惇參決庶務十二月庚午大理  
寺獄空是歲兩浙江西福建旱振之

十五年春正月丁酉朔詣德壽宮几筵行禮辛丑復置  
左右補闕拾遺庚申施師黜罷甲子以黃洽知樞密院  
事蕭燧參知政事二月丙寅攢高宗于永思陵夏四月  
丙戌高宗祔廟詔廷臣曰朕比下令欲衰經三年羣臣  
屢請御殿易服故以布素視事內殿雖詔俟過祔廟勉

從所請然稽諸典禮心實未安行之終制乃爲近古宜  
體至意勿復有請庚寅皇太后不許五日一朝德壽宮  
有旨如舊禮月四朝五月巳亥王淮罷判衢州乙巳帝  
旣用薛叔似言罷王淮詔諭叔似等曰卿等官以拾遺  
補闕爲名不任糾劾今所奏乃類彈擊甚非設官命名  
之意宜思自警六月癸酉以江西提點刑獄朱熹爲兵  
部郎官熹以疾未就職兵部侍郎林栗劾熹慢命熹力  
辭栗尋罷秋七月壬戌恩平王璩卒八月甲子朔日有  
食之九月辛丑大饗明堂以太祖太宗配大赦冬十二  
月壬午命朱熹主管西太乙宮兼崇政殿說書辭不至

是歲江西湖北兩淮建寧府徽州水金人聞高宗詔遣使來弔祭後遂爲故事

十六年春正月癸巳金主雍卒孫璟立遣使弔祭及賀卽位遂爲故事丙申黃洽罷知隆興府巳亥以周必大爲左丞相留止爲右丞相王藺參知政事葛邲同知樞密院事乙巳蕭燧罷提舉洞霄宮丙午皇太后移御慈福宮巳未更德壽宮爲重華宮辛亥周必大等奏事孝宗諭以倦勤欲退就休養以畢高宗三年之制因令草詔禪位皇太子二月辛酉朔日有食之壬戌帝吉服御紫宸殿行內禪禮畢周必大奏陛下巽位與子盛典再

見度越千古顧自今不得日侍天顏因哽噎不能言帝亦泫然曰正賴卿等協贊新君遂素服駕之重華宮在位二十七年皇太子既卽位上尊號曰至尊壽皇聖帝紹熙五年六月崩年六十八寧宗上尊諡曰哲文神武成孝皇帝廟號孝宗慶元三年加今諡

論曰孝宗系出藝祖有君人之度其繫人心成乾淳之治宜也獨惜符離喪師規恢中沮觀揚甲對策則帝之苦身焦思不如勾踐羣臣之協心宣力不如種蠡豈諉於烏祿政修國理無夫差之釁歟雖然奚可以是爲盛德疵哉論者謂聰明剛毅爲南渡諸帝稱首其致孝太

皇力行三年之制則千載一人而已自禮廢風頹遂有公除議昏亮陰不輟樂者帝復古以立世防噫偉矣

光宗

光宗循道憲仁明功茂德溫文順武聖哲慈孝皇帝諱惇孝宗第四子也母曰成穆皇后郭氏紹興十七年九月乙丑生帝于藩邸二十年賜名授右監門衛率府副率轉滎州刺史孝宗卽位拜鎮洮軍節度使開府儀同三司封恭王莊文太子薨孝宗以帝英武類已欲立爲太子而以其非次遲之乾道七年二月竟舍兄愷而立帝帝之爲恭王與講官商較前代時出意表及爲太

丁丑臨安究心民政周知情偽孝宗數稱之淳熙十五年二月帝奉詔赴議事堂參決庶務內外除擢自館職部刺史以上乃以閏十六年二月壬戌孝宗內禪帝卽位上孝宗尊號曰至尊壽皇聖帝皇后曰壽成皇后壽皇詔立帝元妃李氏爲皇后甲子帝率羣臣朝重華宮大赦百官進秩一級辛未上皇太后尊號壬申詔內外臣僚陳時政闕失四方獻歌頌者勿受辛巳以生日爲重明節丁亥詔百官輪對三月己亥予擴進封嘉王戊申以壽皇却五日之朝詔自今月四朝重華宮己未左補闕薛叔似右拾遺許及之竝改官拾遺補闕自此罷

夏五月甲午以王藺知樞密院事丙申周必大罷判潭  
州尋改醴泉觀使戊申知閣門事姜特立有罪罷閏月  
癸酉詔季秋有事于明堂以高宗配壬午大理獄空秋  
七月庚辰下詔恤刑九月乙丑戒執政侍從臺諫毋移  
書以薦舉請託戊辰詔侍從官各舉公正彊敏嘗任守  
令及職事官材堪御史者一人甲戌詔監司帥臣秩滿  
到闕薦所部廉吏二人冬十月甲寅大閱是歲諸路  
大水金人遣使來賀卽位其賀生辰正旦自此歲交遣  
使如故事

紹熙元年春正月丙辰朔帝朝重華宮二月辛亥殿中

侍御史劉光祖言道學非程氏私言乞定是非別邪正  
從之三月丁卯詔秀王襲封置園廟夏五月乙卯前丞  
相趙雄坐所舉以賄敗降秩秋七月甲寅以葛邲參知  
政事胡晉臣簽書樞密院事乙卯以留正爲左丞相王  
萌爲樞密使癸酉建秀王祠堂于行在冬十月丙午詔  
內外軍帥各薦所部有將才者庚戌詔諭郡縣吏奉法  
愛民十二月丙戌王閏罷戊子以葛邲知樞密院事胡  
晉臣參知政事是歲安南來貢

二年春正月壬子詔尊高宗爲萬世不祧之廟二月癸  
未班會元曆乙酉詔以陰陽失時雷雪交作令侍從臺



諫兩省卿監郎官館職各具時政闕失以聞辛卯布衣  
余古上書極諫帝怒詔送筠州學聽讀三月丁巳詔自  
今邊事令宰相與樞密院議仍同簽書丙寅詔福建提  
點刑獄陳公亮知漳州朱熹同措置漳泉汀三州經界  
冬十月丙子朔詔罷經界辛卯詔曰朕惟爲政之道莫  
先於養民故自卽位以來蠲除甚賦頒宣寬條嘉與四  
方臻於安富郡守縣令最近民者也誠能拊循惠愛以  
承休德庶幾政平訟理之效今采之人言乃聞科斂先  
期競務辦集而民之虛實不問追呼相繼敢爲椎剝而  
民之安否不恤財計之外治理蔑聞甚不稱朕委屬之

意國用有常固在經理而非培克督趣以爲能也知本  
未先後之誼此朕所貴於守令者繼自今以軫恤爲心  
以牧養爲務俾民安業時予汝嘉十一月辛未皇后李  
氏殺皇貴妃以暴卒閏壬申合祭天地于園丘以太祖  
太宗配大風雨不成禮而罷大赦帝旣聞貴妃薨又值  
此變震懼感疾罷稱賀肆赦不御樓是歲建寧府福汀  
二州及潼川崇慶二府大安石泉淮安二軍興利果合  
綿漢六州大水淮東及階成西和鳳四州旱振之

三年春正月乙巳朔帝有疾不視朝三月辛巳帝疾稍  
愈始御延和殿聽政庚寅宜州蠻寇邊改知鬱州沙世

堅知宜州以討之夏四月乙卯以丘宗爲四川安撫制  
置使戊午帝朝重華宮五月帝有疾不視朝六月辛丑  
朔下詔戒飭風俗禁民奢侈與士爲文浮靡吏苟且飾  
僞者以陳騏同知樞密院事秋七月壬申前丞相周必  
大坐失舉賊吏降秩冬十一月丙戌日南至丞相率百  
官詣重華宮拜表稱賀兵部尚書羅點等各上疏請帝  
朝重華宮吏部尚書趙汝愚亦因面對以請帝開納辛  
卯帝朝重華宮皇后繼至都人大悅是歲江東京西湖  
北水

四年春正月己巳朔帝朝重華宮三月丙子帝朝重華

宮皇后從辛巳以葛邲爲右丞相胡晉臣知樞密院事

陳騏參知政事趙汝愚同知樞密院事癸巳帝從壽皇

聖帝壽成皇后幸聚景園夏五月巳巳進士李儵年五

十四調成都司戶參軍自以祿不及養乞以一官回贈

父母帝嘉其志特詔以本官致仕父母皆與初品官封

丙戌召浙東總管姜特立還六月丙申朔丞相留正以

論姜特立不行出城待罪戌戌祕書省著作郎沈有開

著作佐郎李唐卿祕書郎范黼彭龜年校書郎王奭正

字蔡幼學顏棫吳獵項安世上疏乞寢姜特立召命戊

申參知政事胡晉臣卒巳酉御後殿慮囚甲寅太白晝

見秋七月乙丑朔太白晝見壬午以趙汝愚知樞密院事余端禮同知樞密院事復以陳源爲內侍省押班九月庚午重明節百官上壽請帝朝重華宮不聽己卯上皇太后尊號甲申帝將朝重華宮爲皇后所沮陳傅良引裾力諫不聽是月夏主仁孝卒子純祐立冬十月乙卯會慶節帝以疾不果朝重華宮侍從皆上章居家待罪嘉王府翊善黃裳疏請誅內侍楊舜卿太學生汪安仁等二百人上書請朝重華宮皆不報庚申帝將朝重華宮復以疾不果丞相以下自劾請罷祕書郎彭龜年請遂陳源以謝天下皆不報十一月辛未日中有黑子

癸酉太白晝見戊寅帝朝重華宮都人大悅召丞相留  
正于城外庚辰留正始入朝復赴都堂視事命姜特立  
還故官十二月戊戌帝朝重華宮是歲地大震江浙兩  
淮荆湖水旱振之

五年春正月癸亥朔帝朝重華宮以壽聖皇太后壽八  
十詣慈福宮行慶禮推恩如淳熙十年故事癸酉壽皇  
聖帝不豫丙子大理獄空癸未葛邲罷判建康府二月  
乙未知樞密院事趙汝愚等以蜀世將吳玠卒奏別除  
不行居家待罪戊戌以張詔爲興州諸軍都統制夏四  
月甲午帝幸玉津園皇后及後宮皆從乙未壽皇幸東

園癸卯帝以侍從言將以癸丑日朝重華宮復以疾不  
果丁巳臺諫交章劾內侍陳源楊舜卿林億年離間兩  
宮請罷逐之五月戊辰丞相留正等請帝侍疾正引裾  
隨帝至福寧殿久之乃泣而出辛未丞相以下出城待  
罪知閣門事韓侂胄請宣押入城許之乙亥帝將朝重  
華宮復不果甲申以嘉王府翊善黃裳等奏詔嘉王擴  
問疾重華宮王至宮壽皇爲感動六月戊戌夜壽皇崩  
遺詔改重華宮爲慈福宮建壽成皇后殿於宮後以硬  
定省先是丞相留正樞密趙汝愚余端禮等聞壽皇大  
漸見帝于後殿力請朝重華宮皇子嘉王亦泣以請不

聽至是留正等聞壽皇崩率百官詣宮聽遺詔己亥百官上疏請詣重華成禮辛丑百官拜表請就喪次成服壬寅壽皇大斂詔俟疾愈過宮行禮丞相留正等請皇太后垂簾聽政不許請代行祭奠禮許之仍有旨皇帝有疾聽就內中成服乙巳尊皇太后爲太皇太后壽成皇后爲皇太后丁未丞相留正奏皇子嘉王仁孝夙成宜正儲位以安人心越六日奏三上許之明日擬旨以進俄奉御筆云歷事歲久念欲退閒正大懼秋七月辛酉留正稱疾乞罷政遂逃歸甲子太皇太后以帝疾未能執喪命皇子嘉王卽皇帝位于重華宮之素幄帝移



御泰安宮慶元元年上尊號曰聖安壽仁太上皇帝六年八月辛卯崩年五十四十一月上尊諡曰憲仁聖哲慈孝皇帝廟號光宗嘉泰三年加今諡

論曰光宗非次得立豈不以賢觀其初政緩刑薄賦屏佞舉廉可謂知先務者不幸遭悍后致疾弗終令聞惜哉

宋史新編卷十二

本紀十二

明南京戶部主事莆田柯維騏著

寧宗

寧宗法天備道純德茂功仁文哲武聖睿恭孝皇帝諱擴光宗第二子也母曰懿懿皇后李氏乾道四年十月丙午生帝于王邸五年五月賜名其冬授右千牛衛大將軍淳熙五年遷明州觀察使封英國公九年正月始冠十年始預朝叅十一年當出閣兩宮愛之不欲令居外乃建第東宮之側遷焉十二年三月遷安慶軍節度使封平陽郡王八月納夫人韓氏十六年光宗受禪

進封嘉王紹熙五年六月戊戌孝宗崩光宗疾未平不能出御批付丞相留正有退閒之語詳見前紀中七月辛酉留正以疾辭去知樞密院事趙汝愚遣知閣門事韓侂胄因內侍張宗尹以禪位嘉王之意請于太皇太后不獲遇提舉重華宮關禮告之禮入內泣請于太皇太后乃悟令諭侂胄曰好爲之侂胄出告汝愚命殿帥郭杲分兵衛南北翌日禪祭汝愚率百官詣大行柩前太皇太后垂簾汝愚奉御批議一指揮太皇太后允諾汝愚袖出所擬以進云皇帝以疾未能執喪會有御筆欲自退閒皇子嘉王擴可卽皇帝位尊皇帝爲太上皇

皇后爲太上皇后太皇太后稱善汝愚出以旨諭帝  
固辭曰恐負不孝名汝愚曰天子以安社稷定國家爲  
孝今中外憂亂萬一變生置太上皇何地衆扶入素幄  
披黃袍方却立未坐汝愚率同列再拜帝詣几筵殿哭  
盡哀須臾立仗訖催百官班帝袞服出就重華殿東廡  
素幄立內侍扶掖乃坐百官起居訖乃入行禫祭禮汝  
愚卽喪次請召還留正詔建泰安宮以奉太上皇太上  
皇后尋以秋暑未須移御卽以寢殿爲泰安宮乙丑太  
皇太后命立夫人韓氏爲皇后丙寅大赦百官進秩一  
級詔車駕五日一朝泰安宮戊辰詔求直言己巳以趙

汝愚兼參知政事乙亥以趙汝愚爲右丞相辭不拜以  
陳騏知樞密院事余端禮參知政事戊寅以郭杲爲武  
康軍節度使辛巳以趙汝愚爲樞密使壬午以韓侂胄  
爲汝州防禦使侍御史章穎等劾內侍林億年陳源揚  
舜卿詔億年源與外祠舜卿與內祠甲申以羅點簽書  
樞密院事戊子詔百官輪對罷楊舜卿內祠林億年常  
州居住陳源撫州居住八月癸巳召知潭州朱熹至以  
爲煥章閣待制兼侍講甲午增置講讀官以黃裳陳傅  
良彭龜年等爲之己亥率羣臣朝泰安宮辛丑詔諸道  
舉廉吏糾汚吏壬寅詔經筵官開陳經旨救正闕失丁

未命三省議振恤諸路郡縣水旱丙辰留正罷判建康  
府以趙汝愚爲右丞相丁巳詔侍從兩省臺諫各舉通  
亮公清不植黨與曾任知縣者二人九月庚子簽書樞  
密院事羅點卒辛未大饗明堂大赦壬申以京鏜簽書  
樞密院事甲戌改生日天祐節爲瑞慶節冬十月庚寅  
更泰安宮爲壽康宮癸巳雷乙未詔以陰陽繆戾雷電  
非時令臺諫侍從各疏朝政闕失以聞丙午以朱熹奏  
卻瑞慶節賀表閏月庚申吏部尚書鄭僑等奏請祧僖  
宣二祖正太祖東嚮之位尋立僖祖別廟祔藏順翼宣  
三祖之主是月內批以謝深甫爲御史中丞劉德秀爲

監察御史罷右正言黃度朱熹上疏忤韓侂胄罷奉祠  
趙汝愚力諫及臺諫給舍交章留熹俱不聽十一月丙  
午帝自重華宮還大內庚戌以韓侂胄兼樞密都承旨  
辛亥雨水冰詔行孝宗喪三年乙卯攢孝宗于永阜陵  
十二月乙丑吏部侍郎彭龜年疏論韓侂胄竊弄威福  
詔罷龜年進侂胄一官與內祠趙汝愚請留龜年不聽  
御史中丞謝深甫劾陳傅良罷之己巳陳騏罷庚午以  
余端禮知樞密院事京鏗參知政事鄭僑同知樞密院  
事辛未監察御史劉德秀劾起居舍人劉光祖罷之是  
歲兩浙淮南江東西路水旱振之金人聞孝宗訃遣使

來弔祭又遣使來賀卽位其賀生辰及正旦自是歲  
遣使如故事

慶元元年春正月丙辰白虹貫日二月戊寅以右正言  
李沐言罷趙汝愚知福州甲申復以御史中丞謝深甫  
言罷趙汝愚提舉洞霄宮是月以歲凶民饑下詔曰朕  
德非薄饑饉荐臻使民陷於死亡夙夜慘怛寧敢諉過  
於下耶顧使者守令所與朕分寄而共憂也乃涉春以  
來聞一二郡老稚乏食去南畝捐溝壑咎安在邪豈振  
給不盡及民歟得粟者未必饑饉者未必得歟偏聚於  
所近不能均濟歟官吏視成而自不省歟其各恪意措



畫務使實惠不獲母以虛文蒙上則朕汝嘉三月丙戌朔日有食之是月兵部侍郎章穎國子祭酒李祥博士楊簡以黨趙汝愚相繼罷夏四月丁巳太府寺丞呂祖儉上疏忤韓侂胄送韶州安置尋改吉州己未以余端禮爲右丞相京鏜知樞密院事鄭僑參知政事謝深甫簽書樞密院事庚申太學生楊宏中等六人以上書留趙汝愚章穎李祥楊簡請黜李沐詔各送五百里外編管中書舍人鄧驛上疏救之不聽戊戌詔戒百官朋比六月丁巳右正言劉德秀請考核道學真僞以辨邪正詔下其章癸酉以韓侂胄爲保寧軍節度使提舉萬壽

觀御史中丞何澹乞風厲學者專節孔孟不必自相標榜詔榜于朝堂秋七月丁酉落趙汝愚觀文殿大學士罷祠冬十一月戊戌加上太皇太后及皇太后尊號又上太上皇帝及太上皇后尊號丙午以監察御史胡紘言責授趙汝愚寧遠軍節度副使永州安置未至暴卒十二月丙子以朱熹爲煥章閣待制辭

二年春正月庚寅以余端禮爲左丞相京鏜爲右丞相鄭僑知樞密院事謝深甫參知政事何澹同知樞密院事甲辰右諫議大夫劉德秀劾前丞相留正引用僞學之黨詔落正觀文殿大學士罷祠三月己亥進封弟柄

爲吳興郡王夏四月甲子余端禮罷判隆興府壬申以何澹參知政事葉翥簽書樞密院事五月乙酉申嚴獄囚瘐死之罰甲辰更慈福宮曰壽慈宮秋八月丙辰太常少卿胡紘奏請勿用僞學之黨詔權住進擬冬十月甲戌大閱是月以陳賈嘗攻朱熹召爲兵部侍郎十二月以監察御史沈繼祖言落朱熹祕閣修撰罷祠竄其徒蔡元定于道州

三年春正月壬寅鄭僑罷知福州二月丁巳大理司直邵棻然奏自今權臣僞學之黨勿除在內差遣從之夏閏六月甲午貶留正分司西京邵州居住冬十一月辛

升太皇太后吳氏崩甲辰合祀天地于園丘大赦十二  
月丁酉以知綿州王沈奏詔省部籍僞學姓名宰執四  
人趙汝愚留正王藺周必大待制以上十三人朱熹徐  
誼彭龜年陳傅良薛叔似章穎鄭湜樓鑰林大中黃由  
黃黼何異孫逢吉餘官三十一人劉光祖呂祖儉葉適  
楊方項安世李惠沈有開曾三聘游仲鴻吳獵李祥楊  
簡趙汝談趙汝讜陳峴范仲黼汪遠孫元卿袁燮陳武  
田澹黃度張體仁蔡幼學黃灝周南吳柔勝王厚之孟  
浩趙鞏白炎震武臣三人皇甫斌范仲任張致遠士人  
八人楊宏中周端朝張蘊林仲麟蔣傅徐範蔡元定呂

祖泰凡五十九人

四年春正月丙寅以葉翥同知樞密院事三月甲子攢  
憲聖慈烈吳皇后于永思陵夏五月己酉以右諫議大  
夫張釜等請申嚴僞學之禁乃下詔曰向者權臣擅朝  
僞邪朋比協肆姦宄包藏禍心賴天之靈宗社之福朕  
獲奉慈訓膺受內禪陰謀壞散國勢復安嘉與士大夫  
厲精更始凡曰淫朋比德幾其自新而歷載臻茲弗迪  
厥化締交合盟窺伺間隙毀譽舛迕流言間發將以傾  
國是而惑衆心甚至竊附於元祐之衆賢而不思實類  
乎紹聖之奸黨國家秉德康寧弗汝瑕殄今惟自作弗

靖意者漸于流俗之失不可復返歟將徇于國之寬恩而罰有弗及歟何其未能洗濯以稱朕意也朕既深詔二三大臣與夫侍從言議之官益維持正論以明示天下矣諭告所抵宜各改視回聽毋復借疑似之說以惑亂世俗若其遂非不悔怙終不悛邦有常刑必罰無赦秋七月辛酉葉耆罷八月丙子以謝深甫知樞密院事許及之同知樞密院事是年以知臨安府趙師舜爲工部侍郎選宗室子與愿育宮中後更名曠

五年春正月樞密院直省官蔡璉訴趙汝愚定策時有異謀詔捕鞫彭龜年曾三聘等實其事中書舍人范仲

藝力爭之于韓侂胄事遂寢張釜等復請窮治詔停龜  
年三聘官二月乙酉張釜劾劉光祖附和偽學詔光祖  
房州居住夏五月壬辰朔班統天曆秋八月辛巳太上  
皇疾平帝率羣臣請壽康宮上壽成禮而還太廟夾室  
楹生白芝九月庚寅韓侂胄封平原郡王是歲臨安疫  
江西廣東諸州軍水振之

六年春閏二月庚寅以京鏜爲左丞相謝深甫爲右丞  
相何澹知樞密院事夏五月辛未以久旱求直言六月  
乙酉朔日有食之戊子太上皇后李氏崩戊申同知樞  
密院事許及之母喪去位秋七月丁卯以陳自強簽書

樞密院事八月辛卯太上皇崩丁酉左丞相京鏜卒癸卯攢懿李皇后于脩吉寺九月甲子婺州布衣呂祖泰上書請誅韓侂胄蘇師旦逐陳自强等以周必大代之詔杖祖泰配欽州牢城辛未大饗明堂大赦冬十一月己未皇后韓氏崩十二月辛卯攢光宗于永崇陵壬寅攢恭淑韓皇后于廣教寺癸卯詔改明年元是歲四雨土天下州郡十六水旱振之

嘉泰元年春二月癸巳監察御史施康年劾少傅致仕周必大首倡偽學私植黨與詔降爲少保三月丙寅雨雹戊辰復雨雹己巳復雨雹戊寅臨安大火四日乃滅



語在五行志夏四月辛巳振被災家壬午下詔罪巳辛  
卯詔風俗侈靡災後官軍營造務遵法制內出銷金鋪  
翠焚之通衢禁民無或服用秋七月乙卯何澹罷甲子  
以陳自强參知政事張釜簽書樞密院事巳巳以吳曦  
爲興州都統制兼知興州八月甲申張釜罷以張巖參  
知政事程松同知樞密院事是歲三雨土浙西江東兩  
淮利州路旱振之真里富國獻馴象二

二年春正月癸亥以知閤門事蘇師旦兼樞密都承旨  
二月癸巳禁行私史三月辛亥詔宰執各舉可守邊郡  
者二三人巳巳詔諸路帥臣總領監司舉任將帥者與

本軍主帥列上之夏五月甲辰朔日有食之秋七月己巳同知樞密院事程松父喪去位八月丙子以袁說友同知樞密院事己丑詔作壽慈宮請太皇太后還內冬十月乙亥加上太皇太后尊號十一月庚戌以陳自強知樞密院事許及之參知政事十二月甲申立貴妃楊氏爲皇后加韓侂胄太師庚寅大閱是歲弛僞學之禁趙汝愚朱熹先後追復繼又復周必大少傅建寧府福汀南劍瀘四州水邵州旱振之

三年春正月庚辰謝深甫罷判建康府甲午張巖罷知平江府戊戌幸太學國子祭酒李寅仲進講遂幸武學

賜賚如故事以袁說友參知政事傅伯壽簽書樞密院  
事伯壽辭不拜三月乙巳以費士寅簽書樞密院事夏  
四月己亥朔日有食之五月戊寅以陳自強爲右丞相  
許及之知樞密院事秋七月辛未命殿前司造戰艦八  
月壬寅增置襄陽騎軍九月庚午袁說友罷冬十月癸  
卯以費士寅參知政事張孝伯同知樞密院事十一月  
乙亥祀天地于園丘大赦是冬金國多難沿邊聚糧增  
戍且禁襄陽權塲邊釁之開自此始

四年春三月丁卯臨安大火延太廟甲戌下詔罪己乙  
亥詔百官陳時政闕失夏四月甲辰許及之罷乙巳以

張孝伯參知政事錢象祖同知樞密院事五月乙亥詔諸軍王帥各舉部內將材三人不如所舉者坐之癸未追封岳飛爲鄂王秋八月戊午張孝伯罷冬十月庚子以張巖參知政事十二月癸巳詔總覈內外財賦以陳自強兼國用使費上寅張巖同知國用事己亥詔改明年元年

開禧元年春三月癸未費士寅罷知興元府夏四月戊子朔以錢象祖參知政事劉德秀簽書樞密院事辛卯以皇甫斌爲江陵副都統兼知襄陽府辛丑日中有黑子慶元六年至此凡五見甲寅武學生華岳上書諫朝

廷不宜用兵恐啓邊釁忤韓侂胄送建寧府編管五月  
乙亥詔立曦爲皇子進封榮王是月金國以邊民侵掠  
及增邊戍來責渝盟六月辛卯詔內外諸軍密爲行軍  
之計秋七月庚申以宰相陳自强侍御史鄧友龍等請  
詔韓侂胄平章軍國事立班丞相上三日一朝赴都堂  
治事丙寅以蘇師旦爲安遠軍節度使領閣門事癸未  
以韓侂胄兼國用使八月丁亥命湖北安撫司增招神  
勁軍乙巳以郭倪爲鎮江都統兼知揚州九月丁亥劉  
德秀罷冬十一月乙酉置殿前司神武軍五千人屯揚  
州十二月戊寅金賀正使趙之傑來入見禮甚倨韓侂

胃請帝還內詔使人更以正旦朝見是歲江浙福建  
廣諸州旱兩淮京西湖北諸州水振之真里富國來獻  
瑞象

二年春正月癸巳以金使悻慢館伴使副以下奪官有  
差是月夏州鎮夷郡王安全廢其主純祐自立二月癸  
丑壽慈宮火明日太皇太后移居大內三月癸巳以程  
松爲四川宣撫使吳曦爲宣撫副使乙巳錢象祖罷尋  
貶之夏四月甲子以薛叔似爲湖北京西宣撫使鄧友  
龍爲兩淮宣撫使下納粟補官之令庚午追奪秦檜爵  
謚丁丑四川宣撫副使吳曦叛獻關外四州于金求封

蜀王五月辛巳朔吳興郡王柄卒丙戌江州都統王大節引兵攻蔡州不克軍大潰丁亥下詔伐金癸巳江陵都統皇甫斌引兵攻唐州敗績興元都統秦世輔出兵至固城縣亦大潰甲午詔宗子均立爲沂王柄後後更名貴和是月池州副都統郭倬主管馬軍行司公事李汝翼會兵攻宿州敗績倬與汝翼退走至蘄縣金兵追圍之倬執統制田俊邁以與金人乃得免六月癸丑建康都統李爽攻壽州敗績甲寅鄧友龍罷以丘富爲兩淮宣撫使是月王大節皇甫斌郭倬李汝翼李爽貶竄有差秋七月辛巳貶蘇師旦衡州居住籍其家尋送詔

州安置癸卯以張巖知樞密院事李壁參知政事八月丙寅有司上開禧刑名斷例斬郭倬于鎮江戊辰再奪李爽三宮南雄州安置九月壬午金兵攻奪和尚原辛卯大饗明堂大赦冬十月戊申詔內外軍帥各舉知勇可將帥者二人丙子金人自清河口渡淮遂圍楚州十一月甲申以丘宗簽書樞密院事督視江淮軍馬是月金人犯廬州襄陽其濠隨西和州信陽安豐軍及邊屯多爲金人所破十二月庚戌金人破成州守臣辛禎之遁甲寅金人攻六合縣鎮江都統郭倬遣郭傑救之遇于胥浦橋大敗倬棄揚州走丁巳金人破大散關己巳



貶郭倪南康軍安置庚午薛叔似罷以吳獵爲湖北京西宣撫使甲戌以畢再遇權山東京東路招撫司公事乙亥四川宣撫使程松遁是歲雅州蠻作亂平之蒙古主鐵木真稱帝

三年春正月丁丑朔立密罷己卯命知樞密院事張巖督視江淮軍馬庚辰以陳自强兼樞密使辛卯吳曦招權大安軍事楊震仲不屈死之甲午吳曦僭位于興州二月己未以楊輔爲四川制置使葉適兼江淮制置使乙亥四川宣撫副使司隨軍轉運安丙及興州中軍正將李好義監四川總領所興州合江倉楊巨源等共誅

吳曦傳首獻于廟併誅曦妻子家屬徙嶺南奪其父挺  
官遷吳璘子孫出蜀存其廟祀玠子孫免連坐三月丁  
丑斬僞四川都轉運使徐景望于利州庚子以楊輔爲  
四川宣撫使安丙爲宣撫副使許奕爲宣諭使壬寅連  
貶程松澧州安置夏四月己未以方信孺爲奉使金國  
通謝國信所參議官如金軍議和丁卯召楊輔還以吳  
玠爲四川制置使戊辰以錢象祖參知政事癸酉金人  
復破大散關五月辛卯太皇太后謝氏崩六月癸酉安  
丙殺其參議官楊巨源秋七月乙酉以旱傷下詔罪己  
九月壬午方信孺使回以忤韓侂胄貶臨江軍居住乙

酉楷成肅謝皇后于永阜陵辛卯以趙淳兼江淮制置使乙未張巖罷辛丑遣王栴持書如金軍冬十一月甲戌詔韓侂胄輕啓兵端罷平章軍國事陳自强阿附充位罷右丞相乙亥禮部侍郎史彌遠等以密旨命權主管殿前司公事夏震率兵誅韓侂胄于玉津園遂下詔暴侂胄罪惡于中外丁丑貶陳自强永州居住戊寅貶蘇師旦韶州安置己卯斬師旦詔姦臣竄殛當首開言路以來忠讜中外臣僚各具所見以聞辛巳連貶鄧友龍循州安置丙戌以衛涇簽書樞密院事丁亥詔立榮王曦爲皇太子更名壽後又更名詢戊子貶郭倪梅州

郭僕連州竝安置籍其家貶李壁撫州居住癸巳貶張  
巖徽州居住己亥以立皇太子大赦十二月己酉落葉  
適寶文閣待制庚戌貶許及之泉州居住貶薛叔似福  
州居住再貶皇甫斌英德府安置辛酉以錢象祖爲右  
丞相兼樞密使衛涇雷孝友竝參知政事林大中簽書  
樞密院事乙丑以史彌遠同知樞密院事丁卯詔改明  
年元是歲作開禧曆附統天曆頒之浙西旱蝗沿江諸  
州水

嘉定元年春正月辛巳下詔求言壬辰以史彌遠知樞  
密院事二月戊午再貶程松賓州安置三月癸酉毛自

知坐論用兵奪甲科恩例戊子復秦檜爵諡己丑王栻  
再自金軍還辛卯詔梟侂冑首併函蘇師旦首畀金易  
淮陝侵地夏四月戊午再貶陳自强復州團練副使雷  
州安置籍其家閏月丁酉以旱求直言五月丁卯以蝗  
災詔侍從臺諫疏奏闕改監司守令條上民間利害六  
月庚午金人歸大散關辛未金人歸濠州乙亥衛涇罷  
知潭州甲申簽書樞密院事林大中卒秋七月癸丑以  
丘宗同知樞密院事未幾卒八月辛巳以婁機同知樞  
密院事樓鑰簽書樞密院事甲午發廩振糶江淮流民  
九月辛丑金遣完顏侃喬宇來己未詔以金國和議成

諭天下冬十月丙子以錢象祖爲左丞相史彌遠爲右丞相竝兼樞密使雷孝友知樞密院事婁機參知政事樓鑰同知樞密院事己卯錄慶元上書楊宏中等六人十一月丙辰金主璟卒宗室永濟立和議復成通使如故事戊午右丞相史彌遠母喪去位十二月戊辰錢象祖罷判福州庚午再貶李沐信州居住

二年春正月丁巳以樓鑰參知政事章良能同知樞密院事宇文紹節簽書樞密院事夏五月丙申右丞相史彌遠起復秋八月乙丑以安丙爲四川制置大使罷宣撫司九月辛丑大饗明堂大赦是歲諸路旱蝗黎州蠻

宋史紀事本末卷之三  
寇邊郴州峒蠻李元礪作亂衆數萬連破吉郴諸縣

三年春正月甲辰下詔招諭羣盜又詔戒飭監司郡守  
夏四月己巳詔臨安府給細民病死者棺襯六月丁巳  
朔日有食之冬十二月戊午婁機罷知福州是歲兩浙  
大水振之李元礪數敗官軍勢益熾湖南賊羅世傳縛  
元礪降

四年春正月己丑敘州蠻寇邊秋七月丙寅詔四川官  
吏嘗受僞命者毋得敘用九月丁丑詔附會間邊得罪  
之人毋得敘用冬十月甲辰命江淮京湖四川制置司  
謹邊備時金爲蒙古所迫州郡多降蒙古十一月己酉

朔日有食之是歲夏主安全卒宗室遵頊立

五年夏五月癸酉封李龍翰子吳昂爲安南國王秋七月戊辰以雷雨毀太廟屋避正殿減膳冬十月辛巳詔諸路總領官歲舉堪將帥者二三人安撫提刑舉可備將材者各二人十一月壬戌合祀天地于圜丘大赦是歲敘州蠻降

六年春正月庚申簽書樞密院事宇文紹節卒二月乙未詔宗室毋與胥吏通姻著爲令三月癸亥褻鑰罷夏四月丙子以章良能參知政事秋八月金人弑其主承濟宗室珣立閏九月癸巳雷乙未又雷明日下午巳詔



是歲兩浙諸州大水振之

七年春正月丁丑參知政事章良能卒三月丁卯以安丙同知樞密院事庚辰金人來督二年歲幣秋七月甲子以鄭昭先簽書樞密院事乙亥金人迫於蒙古遷都汴遣使來告是月夏人以書來四川議夾攻金不報八月戊申安丙罷知潭州九月壬戌朔日有食之冬十月壬辰出內帑錢振臨安貧民是歲黎州叛蠻畜卜始降起居舍人真德秀奏罷金國歲幣

八年春正月辛未命侍從兩省臺諫各舉將材三人二月丙午雷孝友罷三月辛丑詔大郡歲舉廉吏二人

郡一人辛巳應賢良方正能直言極諫科何致坐妄造  
事端熒惑衆聽配廣西半城夏四月癸卯以旱求直言  
五月甲辰詔賊吏毋得減年參選著爲令秋七月辛酉  
以鄭昭先參知政事曾從龍簽書樞密院事九月辛未  
合祭天地于明堂大赦是歲兩浙江東西路旱蝗振之  
九年春二月甲申朔日有食之辛亥東西兩川地大震  
自是三月六月十月數大震是歲詔侍從兩省臺諫舉  
堪監司者各二人黎州山崩

十年春二月庚申地震夏四月金人犯光州遂分兵犯  
樊城圍棗陽光化軍詔江淮制置使李珣京湖制置使

趙方及四川制置使董居誼禦之廬州鈐轄王辛敗金人于光山縣金兵遁去徐州光化竝以捷聞五月癸卯趙方請以伐金詔天下乃下詔略曰犬羊跨我中原天厭乂矣狐兔失其故穴人競逐之若能立非常之勳則亦有不次之賞遂傳檄招諭中原官吏軍民六月庚戌太白晝見辛未東川大水癸酉太白經天秋七月丙子朔日有食之冬十一月庚辰太白晝見戊戌太白經天十二月金帥完顏贊以步騎萬人犯四川迫諸堡統制劉雄棄大散關遁金人據之是歲雅州蠻寇邊

十一年春正月壬午京東路忠義李全率衆來歸詔以

全爲京東路總管二月甲辰金人焚大散關丙午金人  
破阜郊死者五萬人夏四月戊午金人復犯大散關守  
將王立遁己未金人犯黃牛堡興元都統吳政拒退之  
癸亥政至大散關執王立斬之五月癸未蚩尤旗見長  
竟天丁亥詔羣臣集議平戎禦戎和戎三策秋九月辛  
巳大饗明堂大赦

十二年春正月戊辰朔召董居誼詣行在以聶子述爲  
四川制置使辛卯金人復犯西和州守將趙彥呐設伏  
待之殲其衆乃還乙未興元都統吳政及金人戰于黃  
牛堡死之二月癸卯金人破武休關丁未金人破興元

府庚戌以曾從龍同知樞密院事任希夷簽書樞密院  
事辛亥金人破大安軍連破洋州壬子四川制置使董  
居誼遁都統張威遣統制石宣等邀擊金人于大安軍  
大破之獲其將巴土魯安乙丑夏人復以書來四川議  
夾攻金人利州安撫丁焞許之三月己巳以鄭昭先知  
樞密院事曾從龍參知政事閏月癸亥興元軍士張福  
莫簡等作亂以紅巾爲號是春金人圍安豐軍滁濠光  
三州遂分兵自光州犯黃州之麻城自濠州犯和州之  
石磧自盱眙軍犯滁州之全椒來安及揚州之天長真  
州之六合游騎數百至東采石楊林渡建康大震京東

總管李全自楚州忠義總轄季先自漣水軍各引兵來  
援金人乃解去全追擊敗之獲其貴將夏四月庚午張  
福入利州四川制置使聶子述遁殺總領財賦楊九鼎  
尋掠閬州果州焚遂寧府入普州是月曾從龍罷以安  
丙爲四川宣撫使奪董居誼官六月丙子太白晝見辛  
巳西川地震太白晝見辛卯太白經天是月沔州都統  
張威執張福送宣撫司秋七月丙申張福伏誅紅巾賊  
悉平再貶董居誼永州居住冬十二月巳丑京湖制置  
司遣統制扈再興許國等引兵六萬人分二道伐金  
十三年春正月丁酉扈再興攻鄧州許國攻唐州不克

而還金人追之遂攻樊城趙方督諸將拒退之夏六月  
壬午以季先爲漣水軍忠義副都統命赴樞密院議事  
未至殺之秋八月癸亥皇太子詢薨壬申四川宣撫使  
安丙遺夏人書定議夾攻金人癸未四川宣撫司命統  
制王仕信引兵赴熙鞏州會夏人遂傳檄招諭陝西五  
路官吏軍民九月辛卯夏人引兵伐金圍鞏州且來趣  
師甲午統制王仕信引兵發宕昌乙未統制質俊李寔  
引兵發下城戍戍四川宣撫司命都統張威等分道進  
兵張威出天水程信出長道陳立出大散關田胃出子  
午谷陳昱出上津乙巳程信王仕信引兵與夏人會于

鞏州攻城不克壬子程信及夏人攻鞏州又不克信引兵趨秦州夏人退師冬十月丁巳朔程信邀夏人共攻秦州夏人不從信引兵還諸將皆罷兵程信以宣撫司之命斬王仕信于西和州張威罷軍職十二月癸未鎮江副都統翟朝宗以皇帝恭膺天命之寶來獻是歲雅州叛蠻降黎州土丁叛宣撫司招降之

十四年春三月丙戌鄂州副都統扈再興引兵攻唐州丁亥金人破黃州知州事何大節棄城遁死乙未詔京湖制置司趣援蘄黃己亥金人陷蘄州知州事李誠之死之癸丑金人退師扈再興擊敗金人于天長鎮明日



運敗之夏四月戊辰金人渡淮而北李全遣兵追擊敗之五月甲申朔日有食之六月丙寅詔以姪貴和爲皇子更名竑進封祁國公秋七月辛丑以趙方爲京湖制置大使賈涉爲淮東制置使兼京東河北路節制使八月乙卯任希夷罷壬戌以宣繪同知樞密院事俞應符簽書樞密院事九月癸未詔宗子貴誠立爲沂靖惠王後辛卯大饗明堂大赦冬十一月京東安撫張林叛降于蒙古十二月庚申鄭昭先罷是歲浙東江西福建諸路旱沔成階利四州水振之

十五年夏五月丁巳封子竑爲濟國公己未以姪貴誠

爲邵州防禦使六月辛卯簽書樞密院事俞應符卒  
七月甲子詔江淮荆襄四川制置監司條畫營田未上  
八月己卯命戶部詳議義役甲午有彗星出于氏九月  
辛亥以宣繪參知政事程卓同知樞密院事薛極簽書  
樞密院事冬十二月丁亥以季全爲保寧軍節度使兼  
東路鎮撫副使

十六年春三月戊申張林所部邢德來歸詔進二宮以  
爲京東東路副總管夏六月丁酉同知樞密院事程卓  
卒秋九月庚子朔日有食之冬十二月庚寅金主珣于  
于守緒立是歲江淮諸州水振之夏主遵頊傳位於

德旺

十七年夏六月丁卯朔太白經天晝見壬辰大名府蘇椿等舉城來歸詔悉補官卽以其州授之秋八月丙戌帝違豫閏月丁酉帝崩在位三十一年年五十七歲遠傳遺詔立姪貴誠爲皇子更名的卽皇帝位寶曆元年正月上尊諡曰仁文哲武恭孝皇帝廟號寧宗二年加今諡

論曰昔人言世主中人之資可與爲善可與爲惡之寧宗不其然耶當其受禪之初少召召儒生嘗讀朱熹講義答熹曰大要在求說

幾道學斥邊禍啓末年怠荒權臣得矯命廢立皇儲何  
治亂之相懸乎蓋用趙汝愚則治用韓侂胄史彌遠則  
亂沃心惑志其效固不同此君子所以致論於鼎鉉也

宋史新編卷十二